

Chiiruajatkat Karaloukta nütüma JUAN

¹ Taya, chi laülaakai napüleerua na anoujashiikana nünain Jesucristo sulu'u tü outkajaaleekat yaaya, tashajün joolu'u pümüin wawala aneekuushikat nütüma Maleiwa, oo'ulaka namüin na püchooinkana, na a'waajüshiikana Maleiwa jutkatshiikana cha'aya, jia aishiikana tapüla saa'u jünoujain tü shiimüinkat wanaa tamaa. Je nnojoliishii jia alin ne'e tapüla tamüiwa. Aishii jia süpüla tü wayuukolüirua süpüshua eekai sütüjaain saa'u tü shiimüinkat. ² Tashajün jümüin süka jikirajuushin sünain tü shiimüinkat. Tacheküin süpüleerua jülüjün jaa'in tü shiimüinkat süpüla jünoujainjatün shia waneepia.

³ Achuntüshi taya jaa'u nümüin chi Washikai Maleiwa otta nümüin Jesucristo chi Nüchonkai süpüla nee'iyatün na'anasia jümüin, süpüla namüliajün jia, je süpüla naapün wane anaa jümüin. Kasataalejese ayatün jia sünain tü shiimüinkat sümaa aijiraain jia jüpüla jüpüshua.

⁴ Talatashaatasü ma'i taa'in süka taapün jüchiki sünain ayatün jia sünain anoujaa tü shiimüinkat, maa aka saa'in tü nuluwataakat anain waya chi Washikai Maleiwa. ⁵ Tawalayuwaa, jiakana aishiikana tapüla, tü tashajakat achiki joolu'u jümüin, shia tü nuluwataatüjütkalia

anain jia Maleiwa. Nnojotsü waneein pütchi naatajatü. Aluwataanüshii waya paala sümaiwa süpüla aijiraainjanain waya wapüla wapüshua. Shia ne'e tacheekaka jüpüleerua maa'ulu yaa. ⁶ Müleka waa'inrüle süpüshua tü kasa nu-luwataakat anain waya Maleiwa, watüjaajeerü aa'u shiimüin alin nia wapüla je aijiraain waya wapüla. Je tü waapakat achiki wekeroloiwa'aya sünnain anoujaa, shia tü aijirawaakat wapüla wapüshua waneepia.

⁷ Ekerotüsü wainma ekirajünnüü sünnain alawaa sa'akamüin wayuu sainküin mmakat süpüshua. Naya na anujulajakana nüchiki Cristo sünnain nüntüin sünnain wayuun sa'akamüin wayuu. Naya na nüpüshikana chi Ni'ipolokai Cristo, chi Ekirajüikai Alawaa. ⁸ Jalia jia suulia sümalaja'alaain tü ji'yataakat apüla saaliijee jüüjüwaa namüin na ni'ipolokana Cristo. Jüchechera jaa'in sünnain anoujaa tü shiimüinkat, süpüla juwalaajüneenain jia so'uweena wane ka'i nütüma Maleiwa saa'u tü kasa anasü jaa'inrakat. ⁹ Watüjaa aa'ulu jaraliin na ekirajülii nnojoliikana wanaawajiraain aa'in nümaa Maleiwa. Naya na eekana nekirajüin sünnain wane kasa naata suulia tü shiimüinkat nikirajakat anain Cristo. Otta na ayatakana sünnain nekirajüin tü shiimüinkat nikirajakat anain Cristo, wanaawajiraasü naa'in nümaa Maleiwa otta nümaa chi Nüchonkai. ¹⁰ Müleka nüntüle wane wayuu jünainmüin eekai nnojolin nikirajüin tü shiimüinkat nikirajakat anain Cristo, nnojo kamaneein jia nümmüin. ¹¹ Chi eekai kamaneein nümmüin, nükaaliijüin nia

sünain tü mojusukat.

¹² Kettaasü tü tashajüinjatkat joolu'u jümüin sulu'u tü karalouktakat, ja'itairü isain wainma tü tashajeekat jümüin. Kasataalejese tountüin to'unüin jünainmüin süpüla taashajaainjachin jümaa jümülatu'u. Tatüjaa aa'ulu sünain tala-teerüin ma'i taa'in müleka too'ulaküle tia.

¹³ Asakitshii jünain na a'waajüshiikana Maleiwa, na jutkatshiikana yaaya, na aneequushikana nütüma Maleiwa maa aka jiakana.

**Tü nüchikimaajatkat Jesucristo
Wayuu: Tü nüchikimaajatkat Jesucristo New
Testament**

copyright © 2010 Wycliffe Bible Translators, Inc.

Language: Wayuu

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dcbb0234-8491-58d2-b1da-acba92db0647